

Newspaper	Utusan Malaysia
Date	23 February 2016

## PM lawat operasi rondaan bersama PDRM, ATM

**KUALA LUMPUR 22 Feb.** - Datuk Seri Najib Tun Razak hari ini meninjau operasi rondaan bersama Polis Diraja Malaysia (PDRM) dan Angkatan Tentera Malaysia (ATM) yang dilaksanakan bagi menjaga keselamatan awam di sekitar ibu negara.

Perdana Menteri yang singgah di pusat beli-belah Pavilion, Bukit Bintang pada pukul 5.20 petang meluangkan masa kira-kira sejam untuk beramah mesra dengan anggota keselamatan yang bertugas, orang ramai dan pelancong asing.

Tinjauan beliau itu dilihat sebagai jawapan terbaik Malaysia kepada tindakan Australia yang bertindak mengeluarkan amaran secara tiba-tiba semalam, kononnya pengganas sedang merancang untuk menyerang Kuala Lumpur.

Yang turut hadir Menteri Pertahanan, Datuk Seri Hishammuddin Tun Hussein; timbalannya, Datuk Mohd. Johari Baharom; Timbalan Menteri Dalam Negeri, Datuk Nur Jazlan Mohamed; Panglima Angkatan Tentera, Jeneral Tan Sri Zulkifeli Mohd. Zin dan Ketua Polis Negara, Tan Sri Khalid Abu Bakar.

Operasi rondaan bersama antara PDRM dan ATM yang dijalankan di bawah Strategi Lautan Biru Kebangsaan (NBOS) itu menyaksikan seramai 340 anggota daripada kedua-dua pasukan keselamatan terlibat dalam rondaan 24 jam sehari di kawasan tumpuan orang ramai.

Sementara itu, Khalid dalam sidang akhbar bersama Zulkifeli berkata, kehadiran Perdana Menteri merupakan bukti jelas komitmen kerajaan dalam memelihara

dan menjamin keselamatan awam di negara ini.

"Atas pertimbangan tersebut dan hasil perbincangan bersama antara PDRM dan ATM, kami bersetuju untuk meneruskan rondaan ini sehingga kita merasakan tidak perlu lagi," katanya.

Hal yang sama diakui Zulkifeli dan beliau berkata, rondaan bersama di kawasan-kawasan tumpuan orang ramai itu telah meningkatkan keyakinan rakyat terutamanya selepas insiden serangan berdarah di Jakarta bulan lalu.

"Tentu sekali rondaan bersama dapat memantapkan lagi keselamatan negara kita dan seiring dengan keadaan itu, keyakinan rakyat dan pelancong asing terhadap keselamatan mereka juga meningkat," katanya.

UM-23/2/2016